

Cari siuri, buna sira!  
Av salût coi mè pastùr:  
anche 'ncò j èi faç 'na vira,  
tûç ansèma, pov'r e siùr.

Ogni vota a s'ancuntrùma,  
cari siuri, csì chi 'n drent:  
pr' in po' 'd temp a ciaciarùma,  
pò 's n'andùma tûç cuntent.

J'avrèj vist che lûminària  
per el vîj d'la sità:  
csè la gent la uàrda 'nt l'aria  
sensa vigghi ndò ch' la và.

Tût sa luce 'nt el vedrèn-ni  
con la crisi ch'u j'è mnì,  
mè um trema fina 'l ven-ni:  
l'è pi ciàr la noç che u dî!

E la gent adès la pensa  
tûç i dî se ch' l'ha da fè,  
per scampè ùj va d'la gron siènsa:  
la quistìon l'è semper lè;

La munèida semp pi rara,  
'ndò ch' la vaga mè sò nent;  
la bensina semp pi cara,  
j fon semp an mà d'j aumènt.

Pò u telefono, la posta,  
i giornàl: tût aumentà,  
cara gent, che gron batosta!  
Per mè cònt son bel e splà.

L'è che a Ruma j'hon d'el testi  
ch'j na fòn 'd tûç i culùr:  
dès j'm gavu tût el festi  
(a fè festa ji pensu lur).

An Friuli u teremoto,  
poi la piova, e frig, e vent:  
j'avrèi vist anche 'ns el foto  
che disàster, povra gent.

Meno male ch'u j'è 'ncura  
tont person-ni col cor bon,  
e pasà gnonca 'n quart d'ura  
j'hon cmensà a dèj 'na mon.

La sicén-na d'ist istà  
l'ha siuà fina la rusa,  
l'acqua l'era ben presiùsa,  
tnivu fina 'l pus sarà.

“Uardè ben ad nent sgarèla”,  
j'ava diç ai mè gripiòn,  
e csè lur, per risparmièla,  
j'hon beivì tût el ven bon.

Poi, cmensà la lèn-na nova,  
anche u temp a l'è cambià:  
uj'è mnì tonta 'd cula piòva  
ch'j avu l'acqua fina 'n cà!

Dapertût 'na gran puciàca,  
tont cmè ch' l'èisa mai piuvì:  
u l'ha fina diç Bargnàca  
prima 'd sèn-na e dop mesdì.

E u j'è stàç la biopsina:  
tonta gent j'hon dvì scapè,  
u j'è gnonc la conegrina  
ch'u la posa fè slinguè.

E 'd pastis ùj n'è 'nche in ater:  
el Marini 'nt i giardèn;  
l'è mai pront, is gram teater,  
da tront'ani ji son d'avsen.

J'm còntavu, certi voti,  
i mè veg, la sira 'n cà,  
ch'j eru 'ndàç con sfors e loti  
a purtèj la civiltà

fina a Tripoli: che cursi  
co u temp bel e co u temp brût.  
Dès la Libia l'ha el risursi:  
senza curi 'm croma tût.

J son pen ad sold da spèndi:  
roba cara o da bun pat,  
basta 'n mac ch'ui sèja da vendi,  
ch'j son pront a fè 'l cuntràt.

Con u Lokeed, cari siuri,  
ùj n'è 'd cùì ch'j'hon pià u stramlòn:  
tûta gent che senza curi  
j brancàvu 'n mûg 'd miliòn.

Gent ch'j bùgiu cmè 'l limàsi  
quond ch' l'è ura 'd travajè,  
ma ch'j môngiu a quat ganàsi  
quond ch'us trata pò 'd mangè.

J'uma 'n mond ch' l'è pèn 'd gramìsia,  
ùj triònfa l'odi e 'l ma'.  
Pòvri noi, e la giústisia  
suma pû 'ndonda ch' la stà.

Ant u Cile u s'è vist pròpi  
che co u tennis suma fort,  
ma 'l sperònsi j son mai tropi:  
fìjsli csè 'nche 'nt j ater sport.

A l'è mej, dès, ch'a la piònta,  
cari siuri, 'd ciaciare.  
Sè, d'la roba ùj n'è 'ncùr tonta,  
ma 'l ven tardi e un bsò cmensè.

Tût 'sta bela cumpania  
a la spècia. J'èi rasòn:  
av presènt ra mè famija  
e cmensùma per da bon.